

Dragi ljubitelji biciklizma i avanture,

dobro došli u Bike park, savršeno odredište za sve vas koji tražite adrenalin i uzbuđenje!

Naš Park vam nudi uzbudljive staze koje će izazvati vaše granice i pružiti vam nezaboravno iskustvo na dva točka. Od adrenalinskih spustova do zahtjevnih tehničkih izazova, naše staze su dizajnirane za sve nivoe vještina.

Sigurnost nam je prioritet, stoga preporučujemo:

- ✓ Da uvijek nosite odgovarajuću zaštitu kako biste uživali u vožnji bez brige.
- ✓ Pridržavajte se oznaka staza i uputa kako biste osigurali sigurnost za sebe i druge.
- ✓ Zagrijavanje i istežanje: prije nego krenete, odvojite vrijeme za zagrijavanje i istežanje kako biste pripremili svoje tijelo za izazove.
- ✓ Ponesite vodu i energiju: uzmite sa sobom dovoljno vode i grickalica kako biste ostali hidratizirani i energični tokom vožnje.

Molimo vas da se upoznate sa pravilima i uputama o korištenju Parka, koje imaju za cilj da vas informišu o rizicima i opasnostima s kojima se možete susresti i da vam pomognu da ostanete sigurni dok uživate u vožnji na našim stazama koje smo za vas pripremili.

Nadamo se da ćete se zabaviti, nadmašiti svoje granice i stvoriti uspomene koje ćete dugo pamtiti.

Uživajte u avanturi i dođite nam ponovo!

PRAVILA KORIŠTENJA BIKE PARKA

1. Ulaznice i Pristup:

- Svaki posjetitelj mora imati važeću ulaznicu za ulazak u Park, što podrazumijeva da je dužan u svakom momentu na zahtjev našeg operatera pokazati, i to, prije ukrcavanja na lift, kao i tokom boravka u Parku.
- Trudnicama, djeci mlađoj od 10 godina, osobama sa srčanim problemima i osobama sa ozbiljnim povredama nije dozvoljeno korištenje Parka.
- Noćna vožnja u Parku nije dozvoljena.
- Uslovi na stazama mogu varirati, potrebno je da se posjetitelji posavjetuju sa našim radnicima prije kupovine ulaznica.
- Nema povrata novca nakon kupovine ulaznica.

2. Licenca za korištenje

- Pristup Biciklističkom parku dozvoljen je isključivo korisnicima koji posjeduju važeću licencu izdanu od strane dežurnog osoblja Parka.
- Licenca podrazumijeva da je korisnik prošao obuku koju provodi voditelj Parka uključujući sigurno korištenje liftova i razumijevanje svih uslova i staza.
- Prilikom obuke, korisnici će biti upoznati s pravilima ponašanja, tehnikama vožnje, te sigurnosnim protokolima na stazama i liftovima.
- Korisnici bez licence neće biti u mogućnosti koristiti Biciklistički park i liftove.

3. Obuća i odjeća

- Za sudjelovanje u aktivnostima Parka obavezna je odgovarajuća zaštitna oprema i zatvorena obuća. Preporučuje se odjeća dugih rukava i nogavica.

4. Pravila ponašanja

- Strogo je zabranjeno paljenje vatre i bacanje opušaka, jer bi takve radnje mogle izazvati požar.
- Stogo je zabranjeno ostavljenje i bacanje otpadaka ili smeća u cilju zaštite životne sredine. Koristite za to predviđene kante na polaznim stanicama liftova ili ponesite smeće sa sobom.
- Ne oštećujte biljke, drveće ili staništa životinja.
- Zabranjeno je korištenje sadržaja Parka pod dejstvom alkohola ili drugih opojnih sredstava.
- Zabranjena je vožnja quadovima, motociklima i drugim prevoznim sredstvima osim bicikala.
- Zabranjeno je šetanje po stazama koje su namijenjene za vožnju biciklima, osim na stazama koje su označene kao šetnice.

5. Odricanje od odgovornosti

Uslov vašeg korištenja ovog prostora i sadržaja Parka, kao i sudjelovanje u aktivnostima, jeste da preuzimate sav rizik od ličnih povreda, smrti ili gubitka imovine koji proizilaze iz bilo kojeg razloga, naročito uključujući: nemar, kršenje odredaba iz Pravila o korištenju Parka, mjera zaštite, korištenja zaštitne opreme i uputstava za korištenje, kao i zanemarivanje uputa i upozorenja od strane radnika KJP "ZOI '84" OCS d.o.o. Sarajevo. Saglasni ste da KJP „Zoi`84“ OCS d.o.o. Sarajevo, kao i radnici u Parku, neće biti odgovorni za bilo kakvu ličnu povredu, smrt ili gubitak imovine i oslobađate nas svake odgovornosti, te se odričete svih potraživanja u vezi s tim.

UPUTSTVO ZA SIGURNO KORIŠTENJE BICIKLISTIČKOG PARKA OC BJELAŠNICA

1. Obavezna oprema i sigurnost

- Svi korisnici Biciklističkog parka su obavezni nositi zaštitnu kacigu.
- Preporučuje se nošenje štitnika za koljena, laktove i rukavice, kao i nošenje odjeće dugih rukava i nogavica.
- Bicikli moraju biti tehnički ispravni s posebnim akcentom na provjeru ispravnosti opreme: pritisak u gumama, stanje lanca, ispravnost kočnica i dr. Uvjerite se da su svi vijci na biciklu čvrsto zategnuti, posebno oni na upravljaču i točkovima.
- Provjerite poziciju sjedišta i odgovarajuću visinu koja za spuštanje treba biti adekvatno podešena na niži nivo.
- Uvijek prilagodite brzinu vožnje uslovima staza, vremenskim prilikama i svojim sposobnostima. Budite svjesni svojih granica i izbjegavajte rizikovanje koje može ugroziti vašu sigurnost i sigurnost drugih korisnika.
- Ne izvodite trikove, skokove ili druge opasne manevre na dijelovima staze koji nisu za to predviđeni.
- Ne koristite staze nakon obilnih padavina kako biste izbjegli povrede i padove.
- Pijte dovoljno tečnosti tokom vožnje, osobito u vrućim vremenskim uslovima, kako biste izbjegli dehidraciju.
- Ukoliko ste umorni ili se osjećate iscrpljeno, pauzirajte vožnju i odmorite se pored staze, prije nego nastavite.

2. Pridržavanje oznaka i pravila na ski liftovima i biciklističkim stazama

- Svi korisnici su obavezni strogo se pridržavati svih istaknutih oznaka, znakova i pravila na ski liftovima i biciklističkim stazama, kao što su: oznake za smjer kretanja, usporivače brzine, upozorenja na opasne dijelove staza i sl.
- Korisnici moraju poštovati sve sigurnosne procedure prilikom korištenja liftova, uključujući pravilno ukrcavanje, iskrcavanje i ponašanje tokom vožnje liftom.
- Uvijek održavajte sigurnosni razmak između sebe i drugih vozača.
- Zaustavite se na siguran način pored staze ako trebate provjeriti stanje vozila ili odmoriti. Ne zaustavljajte se u stazama!
- Koristite zvono ili glas kako biste obavijestili druge vozače ili pješake o svom prisustvu, posebno na uskim stazama.
- U slučaju nepoštivanja oznaka i pravila, korisnik može biti upozoren ili može biti odstranjen iz Parka.

3. Postupak u slučaju nesreće

- Ako dođe do nesreće, ostanite smireni i procijenite situaciju prije nego pokušate pomoći povrijeđenom/ima.
- Označite mjesto nesreće kako bi drugi vozači mogli izbjeći to područje.
- Ne pomičite povrijeđene osobe ukoliko sumnjate na ozbiljne povrede, osim ako je apsolutno neophodno.
- Ako se dogodi nesreća, odmah obavijestite osoblje Parka, pozovite GSS ili hitnu pomoć.
- Preporučuje se osnovno poznavanje pružanja prve pomoći, uključujući postupke za frakture, ogrebotine i ugrize insekata ili životinja.